

आकाशवाणी

1. दिल्ली बीजेपी दे विधायक दल दी बैठक अज्ज लग्गै करदी ऐ। नमें चनोए दे विधायक ते पार्टी दे सीनियर लीडर मेद ऐ जे दिल्ली लेई नमा मुखमंत्री चुनने बारै सलाह सूतर करडन।
2. केंद्री गृह मंत्री अमित शाह होरें जम्मू-कश्मीर प्रशासन गी आखेआ ऐ जे केंद्र शासित प्रदेश च नमें आपराधिक कनून पैहली अप्रैल सवां पूरी चाल्ली लागू कीते जान।
3. भारत दे नमें मुख चुनां आयुक्त ज्ञानेश कुमार होर अज्ज नमीं दिल्ली च अपने ओहदे दा कम्मकाज साम्भडन।
4. यूक्रेन दे राष्ट्रपति व्लादीमीर जेलेन्स्की होरें मंग कीती ऐ जे रूस कन्नै लड़ाई खत्म करने लेई कुसै बी गल्लबात च यूक्रेन गी बी शामिल कीता जा।
5. आई.सी.सी चैंपियन्स ट्रॉफी क्रिकेट टूर्नामेंट अज्जै थमां शुरू होआरदी ऐ। पैहला मैच अज्ज कराची च पाकिस्तान ते न्यूजीलैंड बशकार होग।

<><><><><><>

BJP-Meeting

नमीं दिल्ली च अज्ज दिल्ली बीजेपी दे विधायक दल दी बैठक लग्गै करदी ऐ। बैठका च बीजेपी दे सब्बै नमें चनोए दे विधायक ते पार्टी दे सीनियर लीडर शामिल होडन। पार्टी सूत्रें मताबक बैठका च दिल्ली दे नमें मुखमंत्री दे नास पर खीरी फैसला लैने दी मेद ऐ। दिल्ली दे नमें मुखमंत्री दा शपथ ग्रहण समारोह वीरवारें राष्ट्रीय राजधानी दिल्ली दे राम लीला मैदान च होने दी मेद ऐ। दिल्ली विधानसभा चुनावं च बीजेपी नै 70एं चा 48 सीटां जितियां हियां।

<><><><><><>

President-Qadir

राष्ट्रपति द्रौपदी मुर्मू होंरें आखेआ ऐ जे कतर कन्नै भारत दे सरबंध सदियां पराने न ते ओह भारत कन्नै पच्छिम एशिया दे बपार कारोबार ते सांस्कृतिक सरबंधें दा अननुट हिस्सा रेहा ऐ। कल राष्ट्रपति भवन च कतर दे अमीर शेख तमीम बिन हमद अल थानी हुंदा स्वागत करदे होई राष्ट्रपति होंरें इस गल्लै पर जोर दितता जे दौनें मुख्यें मझाटै बहुपखीय कार्जक्रम ते सहयोग सहजता ते सद्भावना दे गहरी भावना कन्नै जुड़े दे न। उनें आखेआ जे दौनें मुख्य बपार, निवेश, खाद्य सुरक्षा, सेहत, संस्कृति ते उर्जा दे खेतर च विश्वसनीय भागीदार न। राष्ट्रपति होंरें एह बी सुझास दिता जे भारत ते कतर गी नवाचार, प्रौद्योगिकी ते स्टार्टअप च सहयोग बदाने लेई अपनी शक्तियें दा लाह ठोआना लोड़चदा। दौनें मुख्यें इस गल्लै पर सहमति जताई ऐ जे भारत ते कतर दे सरबंधें गी सामरिक भागीदारी दी सतह पर आहने कन्नै दौनें मुख्यें दे करीबी जुड़ाव दी कार्ययोजना तैयार होग। राष्ट्रपति द्रौपदी मुर्मू होंरें कतर दे अमीर हुंदे सम्मान च रातीं आहली रूट्टी दा बी आयेजन कीता।

<><><><><><>

India-Qatar

विदेश मंत्रालय च प्रवासी भारतीय मामलें दे सचिव अरुण कुमार चटर्जी होंरें कल नमीं दिल्ली च प्रधानमंत्री नरेंद्र मोदी ते कतर दे अमीर हुंदे बशकार होई दी गल्लबात दी जानकारी दिती। उनें आखेआ जे दौनें नेताएं दौनें मुख्यें बशकार ऐतिहासिक बपार सरबंधें, लोकें दे आपूं च सरबंधें ते मजबूत दक्खिया सरबंधें गी चेत्ता कीता। उनें जानकारी दिती जे कतर दे अमीर हुंदी राजकीय जातरा दौरान उनें मुख्यें बशकार 2 समझौते ते 5 समझौता जाणें पर दस्तखत कीते गे न। उनें आखेआ जे पहला समझौता दक्खीय रणनीति सांझेदारी गी कायम करने पर ऐ। एहदे अलावा संशोधित दोहरे टैक्स कन्नै बचने आहले समझौते पर बी दस्तखत कीते गेन। सचिव होंरें आखेआ जे दौनें मुख्यें अगले 5 बरें च बपार गी दूना करने पर सहमति जताई ऐ जेड़ा बदियै सलाना 28 अरब डालर होई जाग।

<><><><><><>

HM-JK Criminal Laws

केंद्री गृह मंत्री अमित शाह होरें जम्मू-कश्मीर प्रशासन गी आखेआ ऐ जे ओह इस बरे अप्रैल म्हीने तगर केंद्र शासित प्रदेश च त्रै नमें आपराधिक कनूनें गी ललागू करना यकीनी बना। कल नमी दिल्ली च उनें इनें कनूनें दी केंद्र शासित प्रदेश च अमल आवरी पर इक जायजा बैठक सददी दी ही जेदे च जम्मू-कश्मीर दे उपराज्यपाल मनोज सिन्हा ते मुखमंत्रि उमर अब्दुल्ला होर बी शामिल होए। अमित शाह होरें आखेआ जे इनें 3 आपराधिक कनूनें दे तैहत तौले शा तौले न्यास उपलब्ध कराने लेई नमी टेकनालजी दी जिन्नी होई सकै, बरतून कीती जानी लोडचदी। उनें आखेआ जे जम्मू-कश्मीर च आतंकवादी गतिविधिये च कमी ते सुरक्षा च सुधार दे कन्नोकन्नी हून पुलस गी नागरिके दे अधिकारे दी सुरक्षा गी तरजीह देनी लोडचदी। गृह मंत्री होरें आखेआ जे जम्मू-कश्मीर दे हर हक थाने गी राष्ट्रीय आटोमैटिक फिंगर प्रिंटिंग पंछान तकनीक दा पक्क गै इस्तेमाल करना लोडचदा।

<><><><><><>

Chief election Commission

मुख चुनां आयुक्त जानेश कुमार होर अज्ज नमी दिल्ली च निर्वाचन आयोग कार्यालय च अपना ओहदा साम्भडन। राजीव कुमार हुंदा मुख निर्वाचन आयोग दे तौरा पर कार्यकाल कल समाप्त होने दे बाद जानेश कुमार हुंदी नियुक्त कीती गई ऐ। ओह 1988 बैच दे केरल केंद्र दे भारीय प्रशासनिक सेवा दे अधिकारी न। उनें संसदीय कार्य मंत्रालय च सचिव दे तौर पर बी कम्म कीता हा। एहदे अलावा 1989 बैद दे हरियाणा केंद्र दे आईएएस अधिकारी विवेक जोशी होरेंगी नमां निर्वाचन आयुक्त बनाया गेआ ऐ।

<><><><><><>

Ukraine

यूक्रेन दे राष्ट्रपति व्लादीमीर जेलेस्की होरें इक नमी मंग करदे होई आखेआ जे रूस कन्नै लड़ाई खत्म करने लेई कुसै बी गल्लबात च यूक्रेन गी बी शामिल कीता जा। रूस-यूक्रेन लड़ाई गी खत्म करने लेई अमरीका ते रूस बश्कार इक टीम बनाने पर सहमति बनने दे बाद जेलेस्की हुंदा एह बयान आया ऐ। साउदी अरब दी राजधानी रियाद च कल अमरीकी ते रूसी अधिकारिएं बश्कार होई दी गल्लबात च यूक्रेन दा कोई बी नुमाइंदा शामिल नेई हा।



Coasta-Rika

मध्य अमरीकी मुख्य कोस्टा रिका, अमरीका थमां बाहर कड्डे गेदे अवैध भारतीय प्रवासिएं गी स्वीकार करने लेई राजी होई गेआ ऐ। एहदे नै पनामा दे बन्ने कश बनाए गेदे आरजी केंद्रें च रवा करदे इनें प्रवासिएं दे भविक्ख दा फैसला करने च मदद थहोग। इनें गी उत्थे बसाने दा कम्म अमरीका दी माली सहायता कन्नै कीता जाग। इस समझौते कन्नै अमरीका ग एहदे बड्डे केंद्र नेही बनाने पौंगन जित्थे इनें गी नजरबंद कीता जा। गैर कनूनी तौरा पर अमरीका च रवै करदे भारतीयें खलाफ राष्ट्रपति डोनाल्ड ट्रम्प हुंदी कार्रवाई दा समर्थन हासल करने दी कोश्ट च अमरीका दे विदेश मंत्री मार्को रोबियो हुंदी कोस्टा रीका यात्रा दौरान इस समझौते गी मुकदा रूप दिता गेआं



Rishi-Sunak

बरतानिया दे साबका प्रधानमंत्री ऋषि सुनक होर कल सने-टब्वरै प्रधानमंत्री नरेंद्र मोदी होरें गी जाइए मिले। इक सोशल मीडिया पोस्ट च प्रधानमंत्री मोदी होरें आखेआ जे मलाटी दौरान ऋषि सुनक हुंदे कन्नै कई बक्ख-बक्ख विषे पर शानदार गल्लबात होई। उनें आखेआ जे ऋषि सुनक होर भारत दे बडे हिरखी मितर न ते भारत ते बरतानिया बश्कार रिश्ते गी होर निग्गर बनाने दी तांग रखदे न।



PM-IWT Assam

प्रधानमंत्री नरेंद्र मोदी होरें असम च जोगीधो च ब्रहमपुत्र दरिया च राष्ट्रीय जलमार्ग-2 पर बने दे अंतरदेशीय जलमार्ग परिवहन टर्मिनल दे उद्घाटन कीता ऐ। सोशल मीडिया पोस्ट च उनें इस टर्मिनल गी खेतर दी तरक्की ते समृद्धि लेई बुनियादी ढांचे च सुधार ते अंतरदेशीय जलमार्ग गी बढ़ावा देने दी दिशा च महत्वपूर्ण गैह आखेआ ऐ। केंद्रीय पोत परिवहन जहाजरानी ते जलमार्ग मंत्री सर्बानंद सोनोवाल होरें भूटान दे वित्त मंत्री लेयोनपो नामग्याल दोरजी हुंदे कन्नै इस टर्मिनल दा उद्घाटन कीता हां एह अत्याधुनिक टर्मिनल भूटान ते बांग्लादेश लेई अंतरराष्ट्रीय बंदरगाह दे रूपे च कम्म करोगं एह टर्मिनल भूटान च

गलेपू कोला 91 किलोमीटर, बांग्लादेश बन्ने कोला 108 किलोमीटर ते गुहाटी कोला 147 किलोमीटर दूर स्थित ऐ।

<><><><><><>

Mahakumbh

उत्तर प्रदेश सरकार ते महाकुम्भ मेले दे आयोजकें इनें अफवाई दा खंडन कीता ऐ जिंदे च दावा कीता जा'रदा ऐ जे प्रयागराज महाकुम्भ गी इस म्हीने दी 26 तरीक कोला अगड़े बधाय़ा जा रदा ऐ। प्रयागराज दे जिला मैजिस्ट्रेट रविंद्र मनधाद होरें साफ कीता ऐ जे ऐसा कोई प्रोग्राम नेई ऐ ते एह खबरां पूरी चाल्ली झूठियां ते बेबुनियाद अफवाई न।

<><><><><><>

ICC-Champions Trophy

आई.सी.सी चैंपियन्स ट्रॉफी क्रिकेट टूर्नामेंट अज्जै थमां शुरू होआ रदी ऐ। पैहले मैच च अज्ज कराची च पाकिस्तान दा मकाबला न्यूजीलैंड कन्नै होग। एह मैच भारतीय समें मताबक दिनें ढाई बजे शुरू होग। रोहित शर्मा दी कप्तानी च भारतीय टीम अपना अभियान दुबई च शुरू करोग जेदे च ओहदा पैहला मैच बांग्लादेश कन्नै होग। इस टूर्नामेंट च इक रोजा क्रिकेट दियां 8 टीमां हिस्सा लै करदियां न। सब्बै मैच पाकिस्तान ते संयुक्त अरब अमीरात च खेड्ढे जाने न। आई.सी.सी चैंपियन्स ट्रॉफी दा पिछला खिताब 2017 च पाकिस्तान नै भारत गी रहाइयै जित्तेआ हा।

<><><><><><>

WPL

महिला प्रीमियर लीग क्रिकेट च जंदी रातीं बडोदरा च मुम्बई इंडियन्स नै गुजरात जायंट्स गी 5 विकटें कन्नै हराई दिता। पैहले बल्लेबाजी करदे होई गुजरात जायंट्स नै निर्धारित 20 ओवरें च 120 रन बनाए। मुम्बई इंडियन्स दी टीम नै नेट साइबर ब्रंट दी 39 गेंदें पर 57 रन्जें दी शानदार पारी दी बदौलत छड़ा 16 ओवर ते 1 गेंद च गै लक्ष्य हासिल करी लैता।

<><><><><><>

Read: Abhilasha Sharma

Stand by: Jagmohan Sharma

D.E.O. : Varinder Kumar

Editor : Mustkeem Baig